

修訂日期: 2004/10/13 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 14, No. 537

原始資料: 蕭鎮國大德提供, 維習安大德提供之高麗藏 CD 經文, 維習安大德提供, 闍學新大德輸入 ◆沈介磐大德校對, 北美某大德提供

No. 537

佛說越難經

西晉居士聶承遠譯

聞如是。一時佛在波羅奈私國。賢者飛鳥聚。彼時國中有四姓長者。名曰越難。大豪富珍奇珠寶牛馬田宅甚眾多。難為人慳貪嫉妬。不信道德不喜布施。日未沒。常勅門監。有來乞匄者勿得通也。

難有一子名曰栴檀。亦復慳貪。難後壽盡還生其國中。為盲乞婦作子。其夫言。汝身有重病。今復懷軀。我貧窮無以衣食。汝便自去。婦受教出門外。未遠得大聚糞。便止其中。至九月生一子。兩目復盲。其母行乞食養之。至年七歲。其母言。我養汝大久。且自行拄杖。取食器行乞。當自悲言。世間貧者最為苦惱。今我薄命生貧家。兩目復盲無所見。復為人所輕易。今有乞我少所飲食。愈我飢者。譬如天雨。渴者得飲。兒聞母說如是。便行家家乞匄。復到栴檀家。其子適到時守門者適小出。盲兒徑入前到中庭。如母教說之。時栴檀在高觀上聞其語。大怒呼守門者問之。誰內此盲乞兒者。門監大恐怖。即牽盲兒撲於門外。傷其頭面。復折右臂。壞其食器飯散其地。身體大痛。兒呼悲啼。其母聞之即走到兒所言。何等弊人嬈我子者。我子尚小。兩目復盲。有何等過乃取如是。何壹感天。兒對母言。我到此門中乞。有高聲人。呼多力人牽撲傷我。身體大痛如是。今且死不久。時門上有守神。便謂之言。汝得是痛。尚為小耳。其大在後。汝坐前世有財不布施故。得勤苦。世間富貴無有常。富貴而不布施。如無有財等也。死更苦痛乃愁悔當復何益。時觀者甚眾多。各各自語。其聲遠聞。

佛時從念道覺。與諸比丘俱入城分衛。佛問阿難。是何等聲。忽忽乃如是。阿難便白佛。說盲子母本事已。便叉手白佛。願哀矜到此兒所。佛默然不應。分衛還飯已。便往視之。見盲兒創痛。以手摩其頭目便即開。折傷處即愈。因自識宿命。佛問。汝是前世長者字難不。對言。是也。

佛告阿難。人居世間甚艱苦愚癡。一世父子不相識知。

爾時佛說經。解散其意。

人求子索財	於此二事中
甚憂勤苦痛	他人而得果
有身不能保	何況子與財

譬如夏月暑 息止樹下涼
須臾當復去 世間無有常

阿難白佛。此兒命盡當趣何道。佛言。當入大泥梨中一宿佛說是經時。八萬餘人皆棄三垢得法眼。諸弟子皆歡喜。為佛作禮而去。

佛說越難經